

序記論跋箋

銘

西庄集
九

西庄先生文集卷之十七

序

許荷谷筭朝天記序

余既跋美叔燕山記行詩又聞有朝天錄從美叔亟徵焉讀之累日而不厭作而嘆曰美叔博而詳也夫自肅慎以北燕雲以東數千里間山川風景盡在吾目中非美叔之敏識何以得此余嘗謂幸逢天下無事之時玉帛梯航無遠不通士君子生於下國得奉聘覲之命修使事于天子之庭從容專對退而與賢士大夫揖讓周旋于以考制度禮樂之盛觀文物衣冠之懿以快吾心曾甚樂事也然而余見世之人多齷齪少奇節安於

固陋而憚於跋涉間有使命則縮然而憂出國門惴惴
有可憐之色並日而馳促期而返汲汲焉惟過歸之為
急則他固不足論也義叔年甫弱冠已能盡讀天下書
以文學詞章有聲於朝著又欲足履中國之界以盡天
下之奇觀聞朝廷選使介對衆有願行語銓官舉以
遣之則其志向已非淺矣於其行也沿途搜訪按轡詢
咨凡有得於見聞者備錄而悉記之間亦發之諷詠之
間積成篇帙使讀之者豐豐而忘倦觀其撫華表而徵
鶴言之荒誕過首山而詆唐宗之黷武景仰賢閭徘徊
孤竹之墟像想神禹之績挹二子之清風悠然有千古
不盡之遐思登臨山海高眺乾坤盪滌平生芥滯之胸

襟暨入 皇都宮室城池之壯麗舟車百物之湊集入
士四方之交會其所見益大而所得益富矣至於遇業
本遘之符歷正學書院弭節予有舊之館能孤倡正大
之論以抗群咻而不震不沮所謂自反而縮雖千萬人
吾往者非邪尤可尚也已昔周之時列國聘使之士甚
衆而至今獨義吳季子之觀樂若義叔者其聞季子之
風而興起者歟余於是記嘉歎之不足旣卒業仍叙其
卷首而歸之若其論議之或不能無未盡處而有待於
講刺者義叔於後日當自得之茲不暇贅云丁丑暮春
書于石壁精舍

又

卷中所錄護送軍事亦西方民瘼之大者如 國家早
晚軫念無告而修懷保之政則必有以變通之余昔赴
京時詢得弊端之梗槩而隱痛焉今幾十年而猶徃來
于心宵而不能忘也觀美叔所記充足動余心也程子
曰一命之士苟存心於愛物於人必有所濟況美叔方
昵侍 經席日進獻替之辭此一事如果存心不忘則
西民其有受賜之日慎無如鄙人徒有其心而無其效
也哉西產病隱又識

鍼經要訣序

近取諸身百物皆脩自五臟六腑十二經絡三百六十
五穴上與天地陰陽之運沕合無間非心通造化之妙

而洞觀三才者其孰能知之醫之道其至矣乎近世中
原有醫學入門書乃深於素難而折衷諸家者也然其
用藥治病之方曲折多端變化無窮讀者或得此而失
彼或窺外而遺內雖一情遽神而不易得其藩籬况堂
奧乎余自少多病涉此書累年不敢閣不嘗不欣欣而喜
亦未嘗不慨然而感蓋吾見未至而運用之機不入於
吾手故也歲月往矣已迫遲暮而舊病依然苦未得力
於斯所謂書自吾手亦何益之有前年春居河村
縱有疾無藥可治更觀書中錢氏為分經主治歷
歷詳載其脈或視下藥尤捷鄉里之人知縣錄錄者
按方求穴自可療病而無煩於烹煎顧其為說猶患難

出老年精力難於參尋乃於暇日類聚合經而分元處
治法載灸書之穴下使見者一覽了然無待於求索又
將以謔譁翻出雖使愚婦見之亦可解也老子曰天地
之氣其猶橐籥乎虛而不動動而愈出入身一橐籥也
榮衛脈絡流布運行無一刻停息人或七情不節於內
六氣侵襲於外運者滯行者壅氣血失軌或過或不及
而病生焉鍼灸者所以瀉其過而補其不足也苟得其
宜一二穴足以見效不得其宜多鍼多灸適足以為害
所謂差毫釐而謬千里也東坡云鍼端如毫芒氣出如
車軸余并舉之以戒世之不明經絡而喜施鍼灸者云
萬曆庚子陽月望前二日西厓道人書于河村曲肱齋

慎終錄序

孟子曰養生不足以當大事惟送死可以當大事嗚呼
人子之所當盡心者惟此為大是故初終而有歛殯之
節三月而有葬埋之禮凡附於身附於棺者必誠必信
勿之有悔焉可也古人云卜其宅兆而安厝之既曰卜
又曰安厝則其致謹至矣然其卜法不傳今不可得而
知也意古人凡事專決於卜筮吉則行不吉則廢蓋其
大樸未散精神心術合於神明卜筮所得皆鑒鑒可信
後世人心益漓神不必告以吉凶人亦不敢自信其心
於是卜筮之法隱而葬師之說興亦勢所然也後之君
子雖不甚信其說而亦未嘗全棄而不用至朱子論擇

地則以主勢之強弱坑道之偏正風氣之聚散水土之
淺深力量之全否為言雖郭李之說亦不外此特不用
某山某水可公可侯之說耳嗚呼澤地本欲保安亡者
耳邊及於生人之禍福已非孝子之用心何暇論其理
之有無耶宜先儒之棄而不取也然彼安則此安亦有
不可盡証者矣余不孝生三十二年當癸酉歲先君子
棄養其冬十一月甲申奉葬于天燈山時則伯兄無鱗
兄襄事兄皆主之今年辛丑余年六十又失先妣是春
兄先亡余既無兄弟逢天大感榮榮在疚誰與曰極惟
日夜號慟而性復愚鈍荒迷失次恐不能自盡於大事
以重不孝之罪越十二月乙酉就先君舊兆而合葬焉

日月流邁奄至改歲猶貿貿自持不卽殞滅神識猶定
自念前日事豈無一毫未歉於心者蓋其事緒雖多而
大槩有三爲一曰擇地二曰擇時三曰葬法葬法載在
禮文人所共由自當隨力所及獨擇地擇時措紳士夫
羞稱其說略不經意一朝倉卒之際專倚於葬師之口
故尤多國莽而不通嗚呼此於理豈所宜然夫病卧於
床委之庸醫猶謂之不孝况爲親謀萬世安厝之宅此
何等大事而滅裂如此也旣不詳則如勿用今旣不得
不用其法而又以爲小術而不詳可乎假使不能盡通
其微而略知門戶毋爲庸夫瞽師所欺於心獨無愧乎
乃輯古今術家之說及禮文時俗所傳關於歛葬者間

附以所親驗者聲為上中下三篇總名之曰慎終錄欲
藏之一家以示子弟使知余終天之痛云歲壬寅二月
二十日書于金溪廬次

南陽洪氏世譜序

南陽洪氏世譜者正字洪君瑋所編洪君之言曰吾洪
氏之東肇自守唐其德業勤富時忠義文學之傳世濟其
義輝映簡策其子姓兄弟派系蕃衍歷數十世而彌昌
獨我倉使公一派自落南以後門祚日漸衰薄至於不
肖孫瑋僅得不絕其殘緒而已深懼祖先遺績及雲仍
嗣續湮沒無傳方欲回家舊譜而益廣之歲壬寅在貢
城得洪中樞述重所為序文及譜於西川鄭相公比一

藏尤詳遂參互考證蒐輯繕修自吾始祖至吾祖
父具載官位事蹟及妣夫人家世以見吾派之所自來
而冠之篇有別為族譜圖於其後而於倉使公以下并
其女孫加詳焉然吾先和子孫之布在四方者奚止於
是而今之所得才什一焉將欲廣詢博訪註考而備錄
之以成一姓之譜傳於無窮一日洪君瑞譜過余河上
具道所以余撫卷嘆曰可蘇也果不觀吾譜者孝弟之
心可以油然而生嗚呼豈獨蘇譜也夫抑嘗聞之程子
曰管攝天下人心收宗族厚風俗領是明譜系蓋人之
於譜系猶水之有源木之有根不譜系明然後報本
追遠之誠真和敬宗之通教叙九族之親皆由此出入

世之人雖名為士大夫者往往忘其祖問其高曾以上
已有曰不知者其遠者無論也夫如是孝敬之心何自
而生乎今洪君此譜自近而推遠由親而及疎窮探
索積以歲月之功上下六七百年間瞭然如指諸掌而
其志猶未已勒亦至公編惟南陽之洪源出於中華而
蔓延於東土代有名人出而落相望可謂盛德之耀
而百世之宗也然其經綸之業忠義之節莫盛於文正
公文正之後近二百餘年子孫頗秉其統緒復飛將必
有時余觀洪君敦厚而有文以科第教訓且篤於孝思
不忘其本又如是是必能繩祖武垂昌大其門洪氏其
復興乎余亦文正公外孫既嘉洪君之志而樂觀其業

之有成於是乎言甲辰五月日

永慕錄序

余嘗讀韓魏公重修五代祖塋記云夫謹家牒而心不忘于祖塋者孝之大也惟墳墓祭祀之有託故子孫以不絕為重自志于學每見祖先所為文字與家世銘誌則珍寶而藏之遺逸者常精意搜掇未始少懈時編歲緝寢以大備其所志先域之所在雖距今百有餘年必思博訪而得之卒不墜先業推及先域之八世得以歲時奉祀向使宗牒之不謹祖先文字之不傳雖有孝於祖先之心欲求其宅兆而嚴事之其可得乎其冬至元日寒食初冬祀墳諸詩皆在可見公報本追遠之誠如

此其至不獨勲名德業後世莫及而已也先君子嘗作
家譜先兄又作世系錄皆未脫稿不肖敬承遺志添加
搜輯凡聞見所及靡不失墜自壬寅始今五季餘始末
粗備名之曰永慕錄以時辰玩少慰余風樹之思且欲
示子孫使毋忘今日之意因具載韓公之語後之覽者
亦深有感於斯文也丙午四月日

醫學辨證指南序

醫以辨證為難古之神醫洞視臟腑望表知裏斯固不
可尚已下此切脉而知病抑其次也嗚呼醫非明脉終
不可托以死生近世醫學不傳脉法尤廢俗醫臆決治
病往往病本未甚而回藥誤人者多余於積年喪禍之

餘每念程子不孝不慈之訓未嘗不傷痛閑中偶觀醫
學入門其書專以辨證為主心有感焉於是抄出其緊
切者分內傷外感為二卷名曰辨證指南以與家庭子
弟為救急之用比之臆決者差賢乎爾

記

遠志精舍記

築精舍于北林凡五間東為堂西為齋由齋北出又轉
而西高為樓以俯江水既成扁其額曰遠志湖山登望
之義不識為客疑其義余告之曰遠志本藥名一名小
草昔晉人問謝安曰遠志小草一物而何為二名或曰
處為遠志出為小草安有愧色余在山固無遠志出而

為小阜則固也是有相類者又醫家以遠志專治心氣
能撥昏蠲煩余年來患心氣每餌藥輒用遠志其功不
敢忘曰推類而引其義治心之說亦儒者常談如此數
義皆可為齋號而舍後西山適產遠志每山雨時至青
翠秀佳時為精舍幽趣遂名精舍曰遠志取其實也嗚
呼遠者近之積也志者心之所之也上下四方之字古
往今來之宙可謂遠矣而吾之心皆得之焉之焉故有
所玩玩焉故有所樂樂焉故有所忘忘者何忘其室之
小也淵明詩曰心遠地自偏微斯人吾誰與歸是為記
戊寅四月望前一日書

義烈祠記

扶餘古百濟氏之墟也其臣有以直諫死者曰佐平成
忠有阨窮無死心臨危獻忠者曰佐平興首有捐生抗節
以死衛國者曰將軍階伯其後七百餘年高麗氏之季
李正言符吾舊章斥寇賊為長沙監務縣北十里石灘
實李氏舊居有旌門在焉至今遺民故老往往道其風
烈而俎豆尸祝之興闕焉莫之舉甚為一縣民吏之羞
萬曆己亥余友洪侯興道受命分符于茲邑既至於簿
領文案之暇考圖披牒得四人者慨然發嘆曰此寧非
為守者責也乃謀於一縣父老圖為祠
地得望月
山敬龍山之北山盤水抱境高勢豁允宜妥靈之所於
是興道捐俸節廩召募游手役不煩民數月訖功廟成

率吏民享之既而事聞于朝上嘉之命賜額曰義烈祠所以對風聲而垂後範也竊惟百濟有邦介居二國之間以富強稱其末也昏庸御國斬剗指下舉朝結舌獨有如成公者起而爭之奮不顧身至其纏緼縶絕命猶能陳國家大計庶幾乎王之一悟而無幾微怨懟之辭其忠蘧矣其後興公問國事之已潰不以擯斥為嫌而惓惓不已其言即成公前日之言而其心亦成公前日之心也暨乎江山失據大軍方軌階公又以五千弱卒慷慨赴敵先夷妻子以必死為心卒能陷白刃而無悔雖古烈士何以加此至於恭愍昏亂老髡當國雖號為儒宗名相者莫不頤指氣使李公乃以新進貌然

之身廷叱姦孽不震不懼忠義憤憤之志臨易簣而不
少撓夫以數子之忠節隔世相望肝膽相照而遺塵播
馥之地至今使人起敬則一祠之建其有關於風教大
矣夫天生蒸民有物有則民之秉彝好是懿德人臣事
君致忠既已竭力於平時不幸而當危亂之世則沉身
滅族而不悔者是豈有所為而然哉實出於隆矣秉彝
不能自己之良心也至如百濟高麗之世上下數千年
當時公卿大夫赫然顯耀者何限而易世之後光沉響
絕與草木同腐過其間者無所聞而莫之問獨於此數公
者為之悲愉感歎至於祠廟而字祀之是果何所為而
然哉亦出於秉彝好德不能自己之良心也後之人觀

於此亦可以知所取舍而自勸嗚呼義烈祠之所為作
而朝廷之所憐憫也雖然餘之為縣邈矣四子之節表
表如是而祠廟之建乃在今日豈非有待而然哉余聞
興道為政既以慈祥愷悌得民心益存心於教化牖民
之道乃能責聞幽光激起偷薄以新一邦之耳目其事
尤可尚也抑不知繼興道者能以興道之心為心使祠
宇無廢於永久否乎而扶餘之民又能以四子之節自
砥礪他日蔚為國家之用以無負興道激勸之意也邪
在己之責興道旣盡之矣在人者非興道之所知也廟
凡三間齋廚俱備又作觀善堂於其側為士子歲修之
地分官田以供祀事募居民以守之蓋其後者邑人徐

龜壽云萬曆辛巳孟夏通政大夫弘文館副提學知製
教無經造參贊官春秋館修撰官柳成龍記

玉淵書堂記

余既作遠志精舍猶恨其村墟近未愜幽期渡北潭於
石崖東得異處焉前挹湖光後負高阜丹壁峙其右白
沙縈其左南望則群峰錯立拱揖如畫漁村數點隱映
烟對間花山自北而南隔江相對每日出東峰寒影倒
垂半浸湖水纖波不起金壁相涵殊可玩也地去人烟
不甚遠而前阻深潭人欲至者非舟莫通舟艤北岸則
客亦坐沙中招呼無應者良久乃去亦遁世幽棲之一
助也於是余心樂之欲作小宇為靜居終老之所顧家

貧無計有山僧誕弘者自爲幹其役資以粟帛自丙子
始越十年丙戌粗成可棲息其制爲堂者二間名曰瞰
綠取王羲之仰瞻碧天際俯瞰綠水隈之語也堂之東
爲燕居之室二間名曰洗心取易繫辭中語意或從事
於斯以庶幾萬一爾又齋在北者三間以舍守僧取禪
家說名曰玩寂東爲齋二間以待朋友之來訪者名遠
樂取自遠樂乎之語由齋西出爲小軒二間與洗心齋
相比名曰愛吾取淵明吾亦愛吾廬之語合而扁之曰
玉淵書堂蓋江水至此匯爲深潭其色潔淨如玉故名
人苟體其意則玉之潔淵之澄皆君子之所貴乎道者
也余嘗觀古人之言曰人生貴適意富貴何爲余以鄙

拙素無行世之願譬如麋鹿之性山野其適非城市間
物而中年妄出宦途汨沒聲利之場二十餘年矣舉足
搖手動成駭觸當其時大悶無聊未嘗不悵然思茂林
豐草之為樂也今幸蒙恩解綬南歸軒冕之榮過耳
鳥音而一丘一壑樂意方深是時而吾堂適成將杜門
却掃潛深伏奧俛仰乎一室之內放浪乎山谿之間圖
書足以供玩索之樂疏牖足以忘憂慕之憂佳辰美景
情朋偶集則與之窮回溪坐巖石望青天歌白雲徜徉
魚鳥皆足以自樂而忘憂嗚呼斯亦人生適意之大者
外慕何為懼斯言之不固聊書壁而自警丙戌季夏王
人西庄居士記

論

周禮設女巫論

論曰臣謹按周禮一書聖人範世致治之盛典規模節
司宜無一之不出於正也祝史巫覡之屬其左於道而
害於正也較然矣以之并列於春官之篇而不云者豈
不異哉臣嘗反覆思之而稍得其指意之彷彿焉請偕
有獻焉夫聖人之創制立法也豈不欲使天下萬事同
出於大中至正之道而無邪穢之雜乎然事或有人情
之所向時勢之已然而可以改可以無改者則聖人必
委曲處實約之於法律之中要之不使妨於政害於治
而已此亦聖人之不得已也是故周官司盟掌盟載之

法而先儒以為盟以結信非先王所欲而不禁違德下
衰欲禁之而不能也臣以此知周禮之不去女巫亦非
周公之所欲也勢也何以言之殷商之季民俗尚鬼天
下之人懍懍然常若鬼神之臨乎其上也死生禍福之
寄命於巫覡久矣盤庚賢主也遷都大事也而其詔告
臣民之說猶且不出於死生禍福之間幾類於巫覡詛
禳之為者彼豈謂真有是哉亦知人心之深信以為非
此莫能回也百年久習結於人之心目則雖以周公之
聖其能朝令而夕禁乎雖然禁之不得則亦已矣又為
之設官實司似若當然者何歟嗚呼此聖人之深意而
衆人所難識也比若泥水然浩浩湯湯其勢難遏則必

高其堤防道其所歸使不至於汙漫潰決而為民物之害是矣周公亦知巫覡之難遏防之不高流之不導則惟恐一朝汙漫潰決不可為也於是乎區處條理設教定制統之於六卿之手而臨之以有司之法其事則惟被除弊害而已其用則惟吊喪哭災而已外此者皆法禁之所不許也其意曰既不能禁而又不以吾之法度裁束之則天下後世不知巫覡之可惡樂吾之無法也將肆然自放於法律防範之外以逞其淫巫詭恠之說則不幾於率天下而為巫乎此周公之所懼而女巫之所由設也後之儒者不達此意以周禮為非聖人之書而聖人經世立教之意幾乎熄矣至宋朱子乃始曰其

學而得其心以發明其遺意其言曰使後世有此官則
巫蠱之事安有哉又曰

得來縝密盛水不漏嗚呼

其盡之矣或曰若子之言則後世如佛老之屬其亦道
之邪者而人皆信向之矣聖人有作其亦諉之於勢而
不去乎曰是則大不然比之於人巫覡平人之不善者
也佛老盜賊之殺人者也平人之不善者猶可以法導
之也至於盜賊之殺人者則執之刑之而已設使巫覡
之道如佛老之絕倫藏理以亂萬古吾人之大閑則周
公之去之也將不俟終日尚可設官檢防而止哉嗚呼
人其人火其書廬其居明先王之道以道之此待佛老
之道也臣充不能不以此拳拳於明時也

孔明不諫伐吳論

三代以下經濟之才忠義之節得君之深未有如諸葛忠武侯者獨其不諫先主伐吳一事余未嘗不以為惜不獨此也先主與陸遜相詎於猇亭半年而不得其便兵疲意沮包原隰而為陣以犯兵家之大忌以曹丕之暗在數千里外而猶知其必敗孔明其時雖不在軍中而利害所關豈有不聞聞之而又不冒一言卒使先主喪師糜境奔走僅免幾見執獲何歟余讀史至此未嘗不廢書而嘆誠不知其何意也反覆思之孔明無不言之理特言之而先主不從耳然而不見於史者何耶孔明乃先主帷幄之臣凡深機密議雖無所不與而未嘗

明爭顯諫於外故群臣往往有不得聞知其勢然也且孔明不實史官陳壽之徒得於傳聞而為史其所傳之踈略不足怪也蓋嘗論之先主以新造未集之蜀不忍一朝之忿掃境內而攻吳其為失計孰甚焉趙雲一武士耳猶知其不可況孔明乎知之而不言少有忠愛之心者不忍為君意孔明之必不然也先主之於孔明信之非不篤敬之非不至特其志慮有所不及故有時而不能盡從不從則雖孔明亦無如之何也嗚呼君臣之際豈不難哉先主於一生之會敗之餘無尺土以寄其身晚年纔得孔明勉用其策而不自用一出而成敗是之盡其亦難矣及其基業略成便有自滿之心臨事奮然

不肖曰圖雖孔明在衡而不得措手於其間使十年盡
成之計幾敗於一舉其可悲也夫余以是知君臣交際
之難也夫天下之事難成而易敗故曰成之百年而不
足毀之一日而有餘孔明初在魚腹中揣摩一世之勢
始見先主即告之以跨有荆益保其嚴阻東和諸戎天
下有變命一上將將荆州之衆以向宛洛將軍身率益
州之衆以出秦川百姓孰不箪食壺漿以迎將軍如是
而帝業可興漢室可復又曰孫權可興為援而不可圖
是其規模布置一定於胸中而終身由之如大匠作室
者堵於牆而大小間架皆有成法一毫不可違也如違
則室不可成柰何為主入者不勝其淺狹欲速之心任

其私智亂其成法其敗也固宜以余見之非但先主伐
吳非孔明之意關羽之取樊城攻襄陽威震華夏亦非
孔明之所樂也特羽矜能自伐不屈於人故孔明欲止
而不能耳智者作事不先時而躁動不後時而失機時
未至則導養時晦若無所能時至則奮發勇決捷如影
響周易曰惟幾也故能成天下之務此之謂也當先主得
荊益根本未厚孫權常有圖荊之志祖同於後曹操未
死而其勢方盛為先主君臣計者正當抑鋒蓄力撫尊
二方厚集根本內不失和於孫權以固唇齒之援外不
輕與操戰持重養威俯仰顧盼而徐觀天下之變勢不
出數年而曹操自斃曹丕篡漢天下忠臣義士憤慨不平不

為曹用然後東西齊舉興問罪之師開東之士當裹糧
策馬以迎王師天下不歸漢而誰歸邪天下既歸漢則
一片江東之地可撫而有之何足以勞王師邪嗚呼此
則諸葛公之計而奈何一失於關羽再失於先主荊州
用武之地既為吳有獨以區區益州當天下之勢而欲
為興復之舉憂憂乎其難矣公之出師表曰秭歸蹉跎
關羽毀敗凡事如此難可逆觀余未嘗不三復流涕嗚
呼豈非天哉

李泌好談神仙論

生千載之後而尚論古人於千載之前可謂難矣蓋古
人是非得失之辨惟史家記載是憑然史家之說容有

不可盡信者或出於一時之傳聞或循乎流俗之毀譽
必也參之以行事辨之以心術察之以時勢然後其人
之邪正可論矣唐史云李鄴侯好談神仙恆誕故為世
所輕余不能無疑焉余觀鄴侯平生言論及行己立身
皆有本末有經濟之才有忠愛之心有出處之義有格
君之業初非謾浪無實之流索隱行怪之徒也若使果
如史家之說則鄴侯殆有意而然特世人未之知耳昔
漢初定而張敖謝病辟穀於神仙東方朔在武帝時
以諧謔晦迹而論者以為避世金馬門鄴侯之意無乃
或出於此乎肅代德宗非明智之君李輔國魚朝恩元
載程元振之輩相繼濁亂鄴侯以孤蹤龜僊周旋於其

間以收扶顛持危之效如此而端顏正色非法不道日
與激觸於群咻衆楚之中則其身不可保况可望於行
其志乎是故外則托於神仙說誕之書時為虛曠不近
之談使人聞之而不敢聽之而無怨史氏所謂為世所
輕不知為世所輕正鄴侯當日之所願也輕之者愈多
則害之者愈少矣故鄴侯告肅宗之言曰殺臣者非陛
下乃五不可也五不可之中其二曰功太高也跡太奇
也其後德宗令勿報怨泌對曰臣素奉道無怨於人以
此觀之則鄴侯憂其功跡之太高太奇而自托於道家
者流以求免於濁世之意昭然可見矣夫君子之處世
非一端孔子曰邦有道危言危行邦無道危行言遜蓋

行則不可變言則有時而不敢盡或與之消息逶迤以存隨時之義亦君子之所不得已也後世謂鄒侯真好異道而視之為詭誕者真所謂癡人面前不得說夢何足以知鄒侯也故余論之以自附於春秋微顯聞幽之意云

跋

跋童蒙須知後

童蒙須知者晦庵朱夫子之所著也夫子既編集小學一書以為小子之學則六涵養成就以基進德之地者宜無待於他書而復有此須知何也蓋幼穉之童聞見未廣古今之說難易不同小學雖皆養蒙之道而所載

率多先秦古書下之書言善行亦皆漢唐間言語非齒
齟小兒驟見而輒解者也故更就其所易知所易解者
而為之教以先於小學此童蒙須知之所以作也夫人
之一心敬怠無常自少至老不可一日而無教也一日
教廢則義理誠慤之心消而猖狂放恣之意長一消一
長曰循輾轉以至於久而不復則人理滅而入於禽獸
矣雖聖人與居亦莫能化矣教之道以豫為急須知之
作豫之道也始之衣服冠履次及言語步趨次及灑掃
涓潔次及讀書寫文字及有細雜事皆日用人事之常
而至理之寓也言之至淺行之至近童稚之所易解也
戒飭之教喻之使謹而不敢肆持而不敢忘若飢渴飲

食之常接乎身而慣熟於心則智長習成端莊齊一自
有不期然而然者矣大抵為學有其本教入有其漸有
本故能進有漸故能入能進能入教學之道備矣抑曰
此而竊有感焉聖賢司教化之權所以悶惻當世而欲
兼善天下者前後一揆也三代以上上焉而能行設教
道明於天下而無不教之民三代以下下焉而不行設
教道偏於私淑而天下多不教之民嗚呼此聖賢所遇
之殊而吾民之幸不幸也方今聖人在上闡為魚之
化以視新民之教巨沚以此一書眷眷焉

元經衍義跋

始余讀真西山大學衍義後撫卷歎曰備哉治天下國

家之道盡仁是矣於是乎見君子憂世之深而愛君之切也今者又得晦齋先生九經衍義而讀之西山以後僅見此書而其憂世愛君之心益深且切之竊觀先生生于東國僻陋之鄉自奮於道喪文弊之後其擇理也精其存心也誠其立朝事君也一以堯舜三代為期蓋凜凜乎三者之佐矣遭世休明致位孤貳亦不可謂不遇然先生之道則未始一日得行於朝廷之上矣迨其末年權姦泥之說構交焉白首西遷賦鵬窮微自常人言之不摧然自沮必泊然忘之無復當世之念矣而先生方且於樂天知命之餘抽經指傳發揮治道以寓臣子倦倦之意其忠盛矣夫以西山之書成於田里退休之

日而先生之書作於擯黜無死之中故余以先生為尤
難也然則向所謂憂世愛君之心益深且切者非邪書
凡二十七篇論修身尊賢親親者十五體天命戒滿盈
者十二自敬大臣以下未及論著而先生易簣遂為千
古之遺恨然嘗即其書而論之則道立於上而皇極以
達賢才登庸而庶績允釐九族敦叙而百姓平章興九
經之綱領而先生已言之至於別錄所載反覆乎天命
幾微之際以為持盈守成之本者尤鄭重而極致詳焉
人君苟能體驗於此而神會之則其不言者自當條暢
川達而先生之所以為萬世開太平者有不待他求而
得之矣隆慶己巳即 聖上更化之二年也先生潛德

幽光始稍稍微聞於上既命展贈配享又為之搜索遺書下本道次第刊行將家有而人誦之矣十年前先生之孫浚自月城千里踵門告余曰先祖平生文集已入梓流行惟九經衍義刻板最後今將訛功請書題末于後使後人知之余重其事不敢許既而請益堅不獲終辭嗚呼自古聖賢言治道者莫詳於大學莫要於九經西山衍之於前先生暢之於後而治天下國家之道大備而無餘蘊矣抑又有所感焉者道之廢興雖若由於人事而實係於天命故曰道之將興也與命也道之將廢也與命也然則先生之一書昔晦而今明言湮而今行者夫豈偶然哉自是以後明者益明行者益行蔚然興

堯舜三代之治於吾東則先生當日著書獻忠之願始
塞而又豈非宗社無疆之福哉遂敬書其後萬曆十
一年正月上澣後學豐山柳成龍謹跋

書先君子詩帖後

癸未正月余受恩暇南觀鳥嶺道中遇金海吏裴雲
祥奉先君子手書小帖示余曰言己卯歲以小童侍舟
中蒙賜五言一絕于弱以賜不敢失墜作帖寶藏云噫
孤露餘生早抱終天之慟今於道途之中獲見平日手
澤悲感交集摧咽難勝且念先君子盛德弘度雖在下
賤苟有可取必引而進之想當時手書贈詩之意非偶
然也而雲祥乃能虔奉而寶重之以至於二十九年之

又庶乎恒心而識禮者祥又言曾為監司營吏以家有
九十之母不能離側棄任而役于鄉此尤可尚始知先
君子果有以取之也祥也其母忘先君子之心而更加
勉焉可也男弘文館副提學柳成龍謹識

又書

余於前年既跋此帖付襄吏今春適以本道觀察巡到
金海祥又以帖來示回憶先君昔歲經過之地益增悲
慕更書此語而歸之時甲申仲春念後五日謹書

睡軒集跋

成廟臨御歲久愛養人才激勵風節於是士之英偉卓
犖者蔚然並出可謂盛矣而遭罹厄會一敗塗地壁立如

春氣方至草木敷榮猝遇冰霜之慘風雨之災離披摧折索然而無餘亦可哀也嗚呼善又何負於國哉達城府伯權侯灝元乃騷軒先生之從孫也家藏騷軒遺稿而散失殆盡灝元迺更極意搜求僅百餘篇以鈔于梓又取當時非語附于後又令其友豐山柳成龍略記師友之同禍者知子厚先友記并附之百年之後使騷軒文責事蹟不至於泯滅而無傳者灝元之力也噫後必有三復斯編廢書而流涕者矣

附戊午遺稿

金宗直字走島司藝淑滋之子號佔畢齋善山人
世祖朝登第歷事 睿宗成宗官至刑部判書謚文

簡有孝行文章高潔為一時儒宗喜獎進後學多有
成就鄭汝昌金宏弼以道學名金駟孫俞好仁曹偉
左宗準南孝溫法祜孫等以文章顯其餘指授踐徑
成名者甚衆燕山茂介史禍起時公已卒禍及泉壤
有文集行于世

金駟孫字季雲號濯纓執義孟之子其先金海人世
居清通受業於金宗且能文章性簡亢少許可仕至
吏曹正郎燕山茂介遭史禍或云季克墩為全羅監
司成廟之喪不進有京師而載妓而行駟孫書其
事於史草克墩為堂上賓起此禍云

權五福字嚮之號睡軒見序文

權景裕字君饒又字子汎安東人 咸熙乙巳登第
由藝文館檢閱入玉堂為正字屢遷至校理燕山朝
知時事漸變乞外為堤川縣監戊午禍起與金駟孫
同日死於江南孝溫云君饒性剛毅不喜作為云
空和之語雖入南人劉直敢言嘗言三八學時尹弼商
以大臣當國也自天口上疏曰京兆高天乃兩河司
遇諸途呼之曰君必欲食老夫肉邪得毋然不爾而
去矣山初罹此元科及史禍起禍商為堂上族則饒
以得免受其於金宗直講授之

許登之文炳陽川人秋江集卷志於性理之學嘗於
達叔大亭講古大猷服其端雅嘗語左相洪應曰

世子國之諸君為奸所詐願令與宦寺居處不可云
此亦盛名之權也承文院副正官遂與史禍死
姜孟學司人望與子糾連入弘文館屢遷至正郎坐
戊午獄死江寧詞為大司諫死於甲子之禍
表公法字以時新昌人成化壬辰登第有文名時
與交者皆一時名士嘗為翰林同僚宴飲設牛肉為
上一所知何繼自後見禁同輩云之曰不忍更犯法
也服喪盡禮事聞命加一資後官至同知中樞府
事

洪翰南陽人登乙巳第官至參議性直少許可忤權
貴羅戊午禍杖流道卒中廟朝贈吏曹叅判

鄭汝昌字伯勗河東人號一蠹以孝行薦為叅奉辭
不就登第為翰林官至安陰縣監與金宏弼同志師
金宗直事性理學戊午謫鍾城以卒既而又剖棺後
追贈右議政謚文獻

茂豐訥正德字百源 太宗之曾孫能詩善彈琴構
別墅于楊花渡具小艇漁網常自刺漁船邀詩人騷
客日致好詩無慮千一百篇自號西湖主人戊午被流
遠地

姜景叙字子文晉州人號魚堂 成廟丁酉登第又
捷重試燕山戊午以佾里齋門徒被流會寧後放還
中廟朝官至左副承旨有草堂集一帙後追贈禮

曹判書

李守恭字神平廣州人通判之後領議政克培之孫

成廟戊申澤

科歷正言掌令有諍臣風入弘

文館拜校理應教陞典翰戊午謫昌城移光陽甲子

賜死年四十一

中廟初贈都承旨

鄭希良字淳夫號虛菴燕山初登第為藝文館檢閱

既而坐戊午獄謫義州希良善推卜知吉凶嘗曰甲

子之禍甚於戊午一日絕跡逝去不知所終有詩集

行于世

鄭承祖登燕山甲寅科選補翰林戊午杖流遠地

李宗淮字仲鉤號慵齋能文章善書畫成廟乙巳

登第嘗以書狀官赴京見驛館畫屏不佳以筆塗抹殆盡譯官招通事恠詰之通事曰書狀能書畫必不滿其意而然也譯官悟而肯肯之回程至其處張新粧素屏二坐宗準一書一畫俱臻其妙觀者歎賞戊午謫北界路經高山驛書字師中孤忠自許衆不與一律於壁上而去監司以聞燕山以為有死意遂輒殺之洪貫達救解不得

崔溥字淵淵號錦南羅州人博聞強記英傑不羈成廟朝再登第為弘文館校理奉使濟州船為風所漂泊于中原浙江寧波府邊臣疑倭寇將殺之溥應對捷給得免成廟令上行錄換漂海錄以進官至

禮賓寺正戊午被謫後竟逮被殺

李龜字浪翁慶州人益齋之後成廟己酉登第官

至戶曹佐郎戊午杖流遠地死于甲子之禍中廟

初命贈部承旨南秋江孝溫師友錄云益齋之後朴

彭年之外孫二家之賢萃于一人

李肅字由見固城人古村之後能文章有氣節自號

忘軒成廟戊申登第拜正言戊午以佔畢齋門徒

流珍島後被殺

金宏弼字大猷號寒暄堂師事佔畢齋東方人士皆

以文詞為業其潛心性理之學律已以禮求瀛洛關

閩之緒自宏弼始以薦起為刑曹佐郎戊午謫熙川

移順天被極刑後追贈鎮議政諡文敬

朴漢柱字天支密陽人自號迂拙子遊學佔畢齋門下成廟乙巳登第歷正言獻納言事直截出為體泉郡守戊午秋流碧潼甲子被殺中廟初命贈都承旨

任熙載字敬輿豐川人登戊午科儀以佔畢齋門徒校流熙載士弘之子世說熙載善書嘗題祖舜宗堯自太平泰皇何事苦蒼生不知禍起蕭牆內虛築防胡萬里城一絕于屏上燕山一日粹宰士弘家見屏問之曰誰所書也士弘對以實燕山有怒色曰卿子不肖人也我欲殺之於卿意何如士弘即跪對曰此

予性行不順果如上教臣曾欲啓之而未果遂被禍
或曰熙載常諫其父故士弘不悅而語之云

康伯珍字子韞信川人佔畢齋外甥 成廟丁酉登

第官至司諫戊午杖流

李繼孟字市醇全義人 成廟己酉登第詩文為佔

畢齋所取戊午坐佔畢齋門徒杖流 中宗朝起廢

復用官至贊成謚文平性放達不檢初為己卯士類

所短及士類敗獨申救不已與權姦忤憂懣而卒

姜渾字士浩號永溪子晉州人文名亞於駙孫燕山

末年喪其妻姬哀悼甚令群臣誅之渾作祭文極稱

義悲悼之狀燕山悅自是頗得幸為士類所賤 中

廟朝仕至判中樞府事

書金修撰任甫癸未疏後

余讀沙渾子疏詞懇義直曲折反覆如辨黑白天若祚
宋惟此一篇足以感回皇極表正人心如其不然猶能
孤雖群歌激勵顏波俟百世而無惑矣嗚呼難必者天
也不昧者理也自信者心也後必有三復斯言而流涕
者矣

精忠錄跋

宋氏南渡而後中興之機有三而皆以小人敗方汴京
陷沒金人不能自有委之而去耶已之不德各守其土以
待王師於是李綱建遣張所收河北得亮收河東兩河

既收則天下同宗之天下也及宗澤留守京師招撫群
盜以百萬計連請過河使宋人不為退縮論安之計按
汴之故畫河以守之則金虜必不敢輕窺中原此二機
皆為黃潛善汪伯彥所沮最後武穆以兵出之才
奮不共戴天之志從天下忠勇之士薄伐問罪兵鋒所
至勢如風雨虜遊說遁遁不服而趙氏之遺民舊家
日望旌旗燕山以閉已有破竹之勢視前二公之為事
愈難而功過之恢復之形蓋十八九成時則有秦檜者
潛為虜間巧弄蜚斐之辭以敗之三機既失則天下之事
遂不可為矣然李綱終於傾棄宗澤卒於發背而公之
得禍尤酷於二子其不幸又為如何而秦檜之罪浮於

潛善作夢遠矣詩曰悠悠蒼天此何人哉嗚呼痛矣世
謂檜之姦邪難於辨別故高宗惑之臣則常以為使檜
至此者高宗之心為君親不誠者有以致之也夫君臣
之義父子之倫根於天性本於民彝結於民心而不可
解者也二帝為厲九廟蒙塵少有忠義之心者皆欲壯
首爭死敵彼高宗獨無此心乎便可即其未敵父母之
言亦可以少動矣如武穆者初亦湯陰之一男子耳尺
劍誓天而山河動色四字涅背而鬼神悲泣出萬死不
顧一生之計憤憤不已者其心猶欲何為不過為君父
復讐耳如使高宗稍有肝薪嘗膽泣血枕戈之志則鬼
域之徒雖累千百何足以眩其明而抵其隙以壞我長

城我臣故曰高宗之失在於不誠不在於不明蓋試則明矣不然節義之廢勇略之論寢聞之命精忠之錫前後丁寧其知武穆不為不審金字之牌胡為一日十二於郢城之下我臣之此言亦春秋微顯聞幽之意而公幸予所謂大居正者是也近有薛清者著論妄議公不當班師議公不知權意使公而果出於此則愈足以驗檜之譖而益高宗之惑也世豈有大將主兵於外君命之還而不還而可以成功者哉假令一卒臨江以守而責公專輒則公之本心何以自白於天下後世耶古所云將在軍君命不受者疎此之謂也公惟知鞠躬盡瘁死之與比以徇臣子之節而已至於成敗利鈍則天也

公何固必於其間哉萬曆甲申有謭官來自燕都以精忠錄一帙進者上覽之嘉歎下書局印出而題跋之命謬及於愚臣臣敬取而卒業則凡公平日所著詩若文及宋史本傳古今人叙述詠歌之辭裒集無遺間為圖畫以象公經歷戰陣之跡英姿颯爽風采飛動令人不覺髮豎冠而目裂皆繼之以流涕也嗚呼非忠匪臣非孝匪子前乎百世之上後乎萬世之下所以建立人極綱紀棟樑於宇宙間者何莫非斯道也人心無古今之殊斯道有晦明之異而國之廢興存亡關焉今是編也其意在於課忠責孝有勸有懲其感於人心者深矣況君子益忠而賈禍小人以諂而得志亦豈非來世之

龜鑑耶然則 聖上之所以嘉歎是錄而欲廣其傳者
其為世道慮至矣後之觀者若但喜其戰陣之形擊刺
之狀而欲快心於狼居之止不知以忠孝為本則是直
衛霍之事耳豈足以知武穆哉而亦非 殿下今日印
頒是書之意也萬曆十三年三月下澣資憲大夫禮曹
判書兼同知 經筵春秋館事弘文館提學臣柳成龍
奉 教謹跋

西庄先生文集卷之十八

跋

圖隱集跋

大厦將傾而一木扶之滄海橫流而一葉抗之知其不可而猶且為之者分是故也古人云天能生人各無不足之理常思天下君臣父子有多少不盡分處所謂分者何也天之所以命物而物之所以為則者也然則木之支大厦分也天之仇海分也臣子之忠孝於君親而竭誠盡節以至捐軀殞命者亦分也學者所以此而已知者知此而已行日行此而已盡此者聖勉此者賢如此而生如此而死得喪禍福隨其所遇而吾心安焉若夫時

之不幸方之難為則君子不以爲病焉國隱鄭先生以
義理之學爲諸儒倡當時翕然宗之今其微言緒論雖
無而尋逐然卽其所就之大者而觀之則其亦求盡乎
性分之內而不顧乎其外者歟不然何其見之明而守
之固決之勇而行之果歟嗚呼先生在家爲孝子立朝
爲忠臣迨乎麗運告訖天命去公人民心離矣聖人作萬
物觀一時智能之士爭欲乘風雲之勢依日月之光以
求尺寸之功孰肯以正氏社稷爲念哉惟先生挺然獨
立於風波蕩覆之際確然自守於邦國危疑之日義形
于色不以夷險貳其心旣竭其力之所至不得則以身
殉之無所怨悔豈所謂知其不可而猶且爲之者耶然先

生一死而天衷以位人極以建民彝物則賴以不墜斯
固心之所安而分之所定於先生何戚焉或有以先生
周旋亂世不早潔身為疑者孟子曰有安社稷臣者以
安社稷為悅先生有焉由其如是故不屑屑於進退出
處之常以委身處命於昏亂之世盡瘁宣力國存與存
國亡與亡其忠盛矣任高麗王百年綱常之重於前啓
朝鮮億萬載節義之教於後先生之功大矣先生為相
雖值衰季不能盡展經綸之業而宏綱大目皆已略舉
噫名相烈士合為一傳三千年一見者王炎午之所以
稱文山也稱於先生亦可以無愧矣自先生既沒其道
益著顯于世所以流澤生民裨益新化者不一而足

太宗大王命褒贈先生爵謚

世宗命列于忠臣之編

中宗又命從祀中外文廟其後又於先生所居建書

院賜額自古人君於前代死節之臣存錄崇獎未有如

我朝列聖之惓惓者蓋盛德事也而先生之遺風餘烈

感於人心愈久不替者亦可見矣萬曆甲申秋主上

殿下命芸閣印先生文集先命臣校正訛舛且跋其後

臣承命抵恐謹取諸本反覆參訂舊本元有詩文三百

三篇乃先生之子宗誠所編近歲開城本又添載用李

供奉韻二首送宋正郎按廉慶尚道一首館本又有金

海山城記祭金得培文請勿迎元使疏今臣又得次李

太常韻賀李道村子之在登第三絕原州牧使河允源

詩卷分韻賦詩一篇題圓燈國師語錄跋一篇而與道
村四書雖斷爛不全亦審其出於先生無疑故並取之
摠詩三百八篇讀銘文辭十三篇館本以五七言詩分
類編集然宗誠既云次其先後則後人不啻遽改元本
故今悉依舊本為正只詩文錯出淆亂故以畫像讀以
下八篇為雜著而別之其所新得而不載於三本者別
為拾遺而附于後三本舊無目錄失編書體今為目錄
弁其首館本有附錄一卷而未免冗雜今以史傳行狀
及諸賢寄贈後人叙述祭文各以其類編之其他紀載
煩複無甚發明而得於傳聞難去虛實者間亦刪去於
是先生始終大致始稍明白可觀矣嗚呼世稱先生為

東方理學之祖而遺文散亂亥豕莫辨豈不為後學之
所慨而斯文之益歟今 殿下是舉誠出於崇重先儒
扶植節義激勵人心之美意也顧臣謏聞淺見不足以
稱塞 明旨於萬一然詩曰高山仰止景行行止又曰
民之秉彜好是懿德彼同有是心而興起焉者又豈有
古今之殊哉是集之行將見忠孝之道蔚興於東方各
盡天賦之分以為國家無疆之休也審矣臣不揆愚陋
樂為之言

書李宏仲所藏退溪先生書簡帖後

德蘊於中而文見於外如草木之有根本而枝葉花實
繁茂也今觀是帖雖遊戲翰墨之餘皆森然有法度

善觀者見之足以知妙道精義之所形嗚呼盛哉斯豈
無本而能然哉余友李宏仲久遊先生之門得片言隻
字悉收拾而寶藏之間以示余余奉玩感嘆如與宏仲
再承警歎於隴雲之間謹題數語于後而歸之

孝經大義跋已丑

聖人作六經以詔天下後世其於道德性命之說備矣
然而於孝特加詳焉至別為一經者何耶蓋百行非孝
不立萬善非孝不行所謂天之經也地之義也民之彝
也自天子以至於庶人誠不可一日而不講也隋志曰
孔子既叙六經題目不同情意差別恐斯道離散作孝
經以總會之明其枝流雖分本萌於孝其說是已於此

盡心焉則六經之道舉在是矣秦火既熄遺經間出壁
書與今文譁行雖經所而辨論補綴而輒復湮廢至宋
朱子始為刊誤又次其經傳以復孔氏之舊繼以鄱陽
董氏為之註釋極其歸趣然後一經之條貫煥然其有
功於聖門甚大而經之踴躍實有非偶然者矣惟我
主上殿下以聰明睿智之聖握君師之丕責化民成俗
未嘗不以彞倫為急一日御經筵與儒臣論治道因
嘆孝經之教久廢於世又問其註疏之有無左右以是
編聞即蒙宣索覽之嘉賞將綴梓以廣其傳猶慮窮
閭愚下之民未喻其義也下弘文館悉解以諺語使人
易曉且命臣略叙其後臣竊惟堯舜之道孝悌而已其

親九族平百姓協萬方以至鳥獸魚鼈咸若皆孝之推也三代聖王率由斯道治化之隆後世莫及及其衰也孔子只以空言與弟子相授受卽其經中所載言及古昔必稱先王蓋其傷之也深矣自是厥後微言絕大道壞人心質實已千有五百餘年矣歷代以來雖不無英君詼辟其所以把持世道主張化權者不過曰功利而已術數而已孰肯以是為念哉則善治之不復而禍亂之相尋也無怪乎聖上獨穆然深思推究化源乃於聖人之經尊信表章既以是躬行建極於上又以是導迪備民於下古道之行雖不可一日而冀然降衷秉彝之天亘萬古而猶在聖經所書卽人心所具之理反而

求之寧有不得者哉嗚呼誰無父母誰非人子孰倡而
不和孰感而不應故曰上有好者下必有甚焉者臣知
是書之行也必有油然而起躍然而趨沛然而不可禦
比屋可封之義端可馴致矣其謂之至德要道者非邪
宜 殿下之惓惓於是也萬曆十七年六月下漸資憲
大夫知中樞府事兼弘文館大提學藝文館大提學知
成均館事同知 經筵春秋館事臣柳成龍奉 教謹
跋

書陽明集後

右陽明文集余年十七趨庭義州適謝恩使沈通源自
燕京回臺劾不檢罷棄重于鴨綠江邊而去行囊中有

此集時陽明之文未及東來余見之而喜遂白諸先君
令州吏善寫者謄出既而歲篋笥中忽忽三十有五年
壬辰秋七月倭寇入安東焚先廬及遠志精舍家藏文
籍蕩然一空惟此數卷獨全於茲薄間余得復見之不
覺泫然以悲挾輿俱行到堤川略記梗槩俾子弟寶蓄
之母更遺失云爾癸巳重九前一日跋

書虛菴集後

乙未

右虛菴集一帙 成廟朝名臣鄭希良淳夫所著萬曆
乙未夏江陵守卒君慶晉印寄虛菴平生著述應不止
此所謂流落人間者泰山一毫芒耳世稱虛菴善推占
言吉凶無不中及戊午災禍起一時名流或死或竄而

公謫義州虛菴又曰甲子之禍甚於戊午一夕遁去人
見其衣屨於水上若蟬蛻然故略疑其沉江或云得道
登仙至今晦迹於洞霞山洞間世亦無相遇於吳門者
昔人哀黨錮之禍公天地一網呂高飛竟何益士之遇
此世何其不幸哉三復遺編令人悲歎

題軍案并丹後

天下之事一經一緯而已經緯分明物各止其所而天
下理矣今以軍案分經緯諸色為經居處為緯并井然
如指諸掌治此之謂治亂此之謂亂綱之紀之神而明
之存乎其人余於是深有感焉要可與識者道難與俗
人言意

題八道軍案後

余平日歷官多在文局其為兵官最淺後為判書僅一閱月而逆其時作八道軍案通京外諸色之額合三十萬餘亂後群書散失無一存者而此案偶在其日時存者即亂後額也六七年間消耗至此然苟得其要不患寡也是之不圖其亦莫之如何也已

跋軍額橫骨後

軍政國之大事其脩否係世道之隆替昔桓溫登平乘樓北望中原歎曰使神州陸沉王夷甫諸人不得任其責余今撫此一卷有平乘樓之感不知誰人任此責邪謂難而有至易者存謂易而有至難者在難易之辨

得失之機惟明者知之俯仰千載同一慨也操筆偶書
令人海下

題軍門謄錄後

萬曆己未余以首相承命兼京畿黃海平安咸鏡都
體察使之任兵曹判官李德馨為副使歸後譙崔璿鄭
經世之敬立鄭協南以恭等先後為從事官皆自舉也
戊戌春辭遠凡啓草文移令聽吏方水謄出題曰軍門
謄錄其散落未收者又三之二余以驚勞當國艱危職
無內外無一事裨補徒然去位辱聖主知遇今觀是
錄慨然自愧因忘數語於卷端使覽者知余之罪云

又書其後

數年經營只成無用之空言去者如斯來者復然今年
自家雪裡凍死未知明年甚人喫大碗不托耳噫

再書先君子詩帖後戊戌

萬曆戊戌正月天兵進討蔚山賊圍守累日余奉命
督理我國軍務等事既而師還余暫過河庄裴吏自大
丘攜帖訪余於玉淵精舍干戈七載城郭山川皆失故
形豈意此帖之猶存邪不覺悲慟更識數語於卷後未
知自今以後能得再見否乎是月念三謹跋

書金左相建置六鎮疏後

國朝名卿以功業顯者惟金公宗瑞公之功業之盛莫
過於建置六鎮今觀此疏布置宏遠論議恢張使世之

庸夫孺子小智淺慮取辨口頭沮敗人家國事者氣索
而不敢容其喙亦可謂一代之奇才而實世廟之善
任有以致之也至於末年相業無補顛危徒然一死何
歟語云尺有所短寸有所長信矣然使公之才在今日
必有可觀三復遺編有九原難起之歎嗚呼悲夫萬曆
戊戌五月十八日雲巖居士題于漢陽之寓舍

書延壽書後

己亥

己亥春余居河庄前慶山縣令李浚乃晦齋先生之孫
自慶州憲然來訪見余衰病為言其家有延壽書攝生
養性之道備矣勸余治之余厚其意諾焉其款李君謄
出一件見寄嗚呼李君可謂信士也回於閑中披閱數

過其於養生果不無有益者然孟子曰養心莫善於寡
欲惟此一言約而盡矣苟能從事於此寡之又寡以至
於無則自可精住神住天地造化之機在吾手中矣此
區區者又何足道哉顧余坐談龍肉而實未得嘗反有
羨於炙猪肉而飽者斯可愧也已
是年七月旬後王淵
居士書

退溪先生年譜跋

庚子

余觀古之聖賢立言垂訓以牖後學其功盛矣然其傳
之也必有待於後之人而傳聞之與親見其詳略又相
懸矣於是往者日遠來者日忘幾何不至於泯焉而無
所尋逐嗚呼其可悲也夫萬曆己亥春刻退溪先生文

集於陶山書院士殫工勤越明年夏告成蓋去先生易
簣三十一年而始就其亦艱矣一日鳳城琴君堽之自
陶院來見余河上以年譜為托憶余弗知言者何敢當
此事何敢當此事顧有可諉者念當時及門之人凋謝
殆盡存者亦墓木拱矣今不為之更後數十年求先生
謦欬音容於髣髴猶不可得況進乎此者乎先生出處
去就與夫立朝言論大致有賢孫安道筆記採撫詳悉
可據其講學論道與門人知舊辨難往復者有先生文
集在可以參考無亦依樣畫葫蘆以待後世之君子而
去取焉兼且自校於追慕先師之心為宜乎遂撥昏次
輯成編又以言行錄碣銘墓誌等及教書祭文類次

而附于後俾來世得有攷焉觀者恕其僭妄而補其疎舛則是又余所望也

書 聖諭錄後

小臣無狀受 君親間極之息無一補報末路罪積釁重狼狽如此然猶保全性命食息於田野之間莫非鴻造饗載微忱終無得効之日謹錄平日所承教旨為一冊名曰 聖諭錄庶幾朝夕稽顙瞻拜而讀之且悲且感不能自已云

書亂後詩稿後

余不能詩惟略解詩意耳蓋詩之好否在意趣高下不在辭之工拙譬如大羹玄酒寓至味於無味中一下五

味非不悅口終是偏者勝耳古人以陶韋為詩家正宗如子厚雖亦冲遠只是鍛鍊太過耳東方詩人中余最愛李陶隱其餘皆狂恠怒罵肥膩腐爛語詩意索然此可與識者道難與俗人言惟治心養性者得之夫子以思無邪三字當三百之旨嗚呼其遠矣若余者思既荒雜故其發於言者如此可愧也已亦可懼也已不能盡去者所以志吾病而求樂石於知己之君子也覽者恕焉

跋東坡與人書

初到黃廩入已絕人口不以私甚憂之但痛自節儉日用不過百五十每月朔便取四千

五百錢斷為三十塊掛屋樑上平朝用盡又
撿取一塊却藏去又曰以大竹筒別貯用不
盡者以待賓客此賈耘老法也

余罪廢以來家用頓乏食口二十餘而歲收雜穀僅數
十石計無所出惟節用最可自勉於是以其所入逐月
均分配十二朔為一年之需每月眷租以四石為限用
餘則別貯一瓮以待賓客及科外之用其初家人甚苦
之往往屢空幾不能堪或不免怨詈余亦病之一日看
東坡年譜其謫居黃岡時困於貧窶已行此策與余今
日之事隔百世而如一槩為之撫卷大笑古人固窮安
分素貧賤而無慕於外如此不然而濫費無節不得已

然後求索隣里東西白貸則其所傷者多矣遂以是語家人使之自安而曰書其後以示子弟云

益齋文集跋

庚子秋余在河村東都尹李公時發以新刻益齋先生文集印本見寄且曰益齋吾先祖也亂後內外文籍蕩失殆盡獨此編僅免灰燼恐遂湮沒不傳乃裒聚而改刻之今始訖工欲藏之名山以圖永久予其為我跋其後余謹受而卒業則其曰益齋亂稿者十卷曰櫟翁稗說者四卷曰孝行錄者一卷拾遺一卷摠為若干卷曰撫卷歎曰富哉先生之文也敏哉李公之舉也傳曰君子之澤五世而斬此但言其槩耳夫德厚者流光其遺

風餘韻將百世而猶存豈但以五世限之哉古之所謂
不朽者三事德也功也言也然有德者未必有功有功
者未必有言高麗五百年間名世者多矣求其本末兼
備始終一致巍然高出無可議為者惟先生有焉故今
去先生之亡二百三十四年其遺文之行世也如星斗
麗天喬嶽在望有目者皆可見至於鋒鏃煨燼之中人
且收拾而寶藏之無所失墜又得賢子孫發揮而揄揚
之信乎其德厚而流光也余聞李公始至東都也賤退
甫爾荆棘滿城公私赤立李公為之未久政通人和凡
百施為稍稍復舊乃於調度征繕之暇留心於文教之
事悉取古書籍之有關於學習者刊刻而廣布焉於先

生之文尤加惓惓焉不數月間成此大役敏速如神可見公政事文學之才出入遠甚真可謂先生之後也余於先生亦忝系外派昔在己巳間先君子出牧清州余有覲往來因獲瞻拜先生遺像於進士李潛家潛又先生遠裔也望像卽溫至今森然在目其後聞遺像不全於兵火為之泯然而悲豈料三十年後得見此全集也人事變遷俯仰今古不得不重有感焉若夫先生文章德業之盛牧隱之序盡之余不敢贅只樂道府尹公之事且記余之所感者而歸之使後之覽者知斯集之益可貴重也是年九月上泚後學豐山柳成龍跋

題喪禮考證後

余喪中讀禮記既昏塞過一二編輒忘失且患其記載
浩博而雜出愈難於參考也於是以家禮所載群目為
綱而其間節目各以類附焉分為上中下三編又取楊
氏儀禮服制圖式見於逐條之下以便攷閱云

恭書答太學諸生疏 御札後

伏見 聖諭辭嚴義正足為萬世人臣之程式繩準聖
人謨訓出於常情萬萬固難仰議若夫晦齋先生處乙
巳一節先賢語默行止應有微意尤非後學所敢窺測
但以古人尚論人物之道言之則孟子曰誦其詩讀其
書不知其人可乎是以論其世也夫既誦其詩又讀其
書則其人可知然後又就其一世行事之迹而參互傳

當益求其心之所在以致其欣慕愛悅之誠君子之尚德好善也如此若但取其疑似之端繩之以一切之論求其外而不求其內舉其一而盡廢其百則賢人君子之心徃徃無以自白而自古聖賢亦難免譏議也如孟子遠見齊王時人已疑其干澤孔子之行乎季孫後世必疑其合汚嗚呼其然豈其然乎且以已然之迹觀之則周公遭流言之變避位居東當時王業新造國勢抗拒內則成王之心未明外則三監之禍孔熾事之可言孰有急於此乎破斧缺斨之士猶且憤惋不平形於咏歎二公顧以大臣之重在成王左右熟視三年而不為一語何邪又必待遭風雷之變啓金縢之書成王自悟

然後東轍始西亦何邪以迹言之則二公之所以處此者豈非可疑之甚者乎然周公不以不言疑於二公二公亦不自以含默慙於周公蓋二公之心終非畏禍保位之人其不言蓋必有待而然也出於納納有補之義且非但不可言而遂已其維持護護必有其道皆未可以臆斷也噫豈可以道學名世為百代儒宗其所樹立卓然奇偉姑實不論今但就其立朝終始而言之平生直道而行無所回互雖處風波蕩激之中而不震不悚本末一致無纖毫可疑其為司諫也力捍姦臣身遭中傷斥退田野至於八年之久其終也又困於權姦白首西遷賦鵬窮微萬死而不悔此其立身之節也世亂則一

孰林泉隱居求志歌咏先王之道者將終身及其遇時
一起受知 二聖忠言嘉謨朝啓夕沃莫非三代名臣
訓誥中語 中廟之末先生炳幾引退及 仁廟即位
以隆禮累召當時四方拭目以觀新化先生感 兩朝
知遇之恩力疾一起不辜 仁廟昇遐時事一變斯固人
事之不可預測者也先生既在危邦無可去之義雖欲
不俟終日其可得乎既不可去則所以同事周旋竭其
心力以盡夫忠愛之誠道既不行然後去是其行止久
速與時屈伸可謂合於聖人之道與悻悻一節之士異
矣世人徒見其時擢忠定論救被罪之人而晦齋不言
以為似欠直截然忠定自忠定晦齋自晦齋何必相同

若然則比干以諫死為仁箕子之狂微子之去不得為
仁子聖人既取史魚之如矢則伯玉之君子可廢子賢
人君子所同者心所不同者迹故曰君子仁而已矣何
必同且當時寢齋非不言耳以今觀之忠定之所言者
小晦齋之所言者大孟子曰人不足與適也政不足與
問也惟大人為能格君心之不正寢齋有焉 明朝即立
之物十條啓辭先生所草也大哉言乎雖伊傳告君之
辭無以過此既勸 慈殿以善道道養 明廟又勸
明廟盡子道於 仁宗其他嚴官禁也社戚里也請慎
擇宮人也勿用特旨也勿用判付也封還內旨也宮府
一體也勿開私門也無非所以濟治平之大源而立正

始之要道杜宮掖之徑竇而禱姦邪之心膽其精誠昭著力量甚大包括該盡使其言得用則主禍何自而作區區一二人言亦可不言亦可也其後李邕說先生正指此為說迺曰孝迪書落十條繫人主手足先生竟以此家禍使先生少有觀望時世有所遷就撓屈則其時何時而不顧群姦切齒之怨敢陳先事之戒邪及入對忠順堂也滿庭縮頸面無入色而先生獨從容若已事必光明正大不然恐有士林之禍所謂光明正大者指元衡等交通締結倚附幽陰欲復舊讐而起此獄其言之痛切又忠定之疏之所不及也特言簡而且婉故人不能知耳鳳城請罪時晦齋隨參與否不可考然今

於集中有乙巳秋劄子二篇其一極論讒邪戚里之禍
有曰今者國家運否治亂安危之機係於 慈殿之一
念萬一九重之內隱微之際有纖毫偏私之累則符驗
之著於外自有不可掩而群臣解體國事日非自古幼
主在位母后聽政或不能全德而致禍亂者多矣其所
以至此者蓋有二焉曰信讒邪也私戚屬也讒邪陰肆
眩惑而顛倒是邪戚里恃寵縱恣而干政亂紀未有不
至於喪亡者甚可懼也若欲保宗社而全骨肉之恩莫
如杜其邪徑不借以權勢也又曰三代以下獨稱宣仁
皇后為女中堯舜者以其信任賢相去邪不疑而不施
私恩也太后從父高遵裕抵罪太后曰吾何敢顧私恩

而違天下之公議乎伏願 慈殿以此為法則萬世欽
仰而與宣仁並稱此皆直指元老元衡等狐鼠鬼域之
狀以曉 慈殿之聽無所忌諱其言可謂烈日秋霜矣
非天下之大勇能如是乎其一勸 上盡孝弟之道而
曰及洪嬪鳳城之事略曰聖人人倫之至人君能盡孝
弟之道推之以極其至則通於神明光于四海臣竊念
仁宗於 主上有父道焉 殿下事 王大妃者有
絲毫欠闕則於 聖德有虧而後世不能無疑又言近
日 上教悲慟於洪嬪之出外不忍於鳳城之防禁朝
野聞之莫不感泣非仁孝友愛之至何以及此又曰願
殿下全孝弟之德極人倫之道由是而造堯舜之域

由是而興堯舜之治其言懇惻悲痛至今讀之令人墮涕但其割既成而終不得上意其時鳳城但請防禁尚無他語晦齋或慮言之無益而反速大禍益累 明廟聖德故不果上蓋是時姦臣林立國事起禍益肆胸臆一節凍於一節其勢難以口舌爭如尹任其初止遠竄柳灌適相仁淑罷既而曰白仁傑啓辭任加絕島灌與仁淑付處及權忠定上䟽論救而三人皆以逆誅大禍蔓延不可救撲故晦齋於忠定䟽中刊去危言而曰勢已至此徒惹起不測奚益其意可見夫賢人君子諫說於君非但自為己事而已所愛者君所憂者國言之而有補於君有益於國則固君子之所願何憚而不言者

言之而無益非徒無益反愈甚焉則事雖可言而有時
不敢盡以存隨時之義此雖非事君之常道而亦理勢
之所不得已也斯義也在易尤詳言之故曰知時識勢
學易之大法晦齋於此必有所見矣昔程明道不非新
法其為神宗言但曰興利之臣日進尚德之風寢衰其
後每曰新法之害吾黨激成之君子之用意宛轉而慮
事深遠也如此此事惟明道知之如呂晦張戢諸人舉
不及此蓋小人之性其毒如蛇蝎其暴如狼虎彼方肆
其狠愎力戰天下之公議以求必勝君子於此若一舉
而絕其根本使無後患則豈不善哉不然擄虺螫之頭
踐虎狼之尾求以止亂適以長亂乙巳小人聲言鳳城

賢明衆心歸附以此為機穽當時一言救解大禍立至
晦齋雖不明言鳳城之寃而以讒邪戚里之禍孝弟堯
舜之道披肝瀝血詳論而極言之無非為鳳城地也嗚
呼莫難於知人莫甚難於知聖賢之心柳下惠三黜不
去而孟子以為介蓋既三黜則知其以直道事君不以
不去之故而傷其介今晦齋先生有下惠之三黜而無
下惠之不去使當日少貶其道以從時議則三公之貴
萬鍾之富可以安享何故而離親去國投竄流離墮身
於魑魅之域哉如遇孟子其以為介乎不介乎斯固未
可知而千載之下有志之士必有扼腕而太息者也慶
曾南門推鞠時先生同參與否亦未可知其時三人已

死見鞠之人乃李德應成蕃及婢子毛麟等輩耳聖
諭鞠諸賢於南門外此必有所指而未知為何人也先
生既為獄官而國有大獄無論虛實參與不參固不足
論也獨其并錄勲籍誠為不幸當時入對忠順堂諸公
舉皆不免權忠定亦與焉晦齋力辭至曰非但有議於
一時亦且傳笑於萬世如此而猶不得免則斯又事勢
之無可如何者也惟有不享其利為自處之道未數月
而先生去位矣嗚呼滔滔者天下皆是群群而生逐逐
而死者何限其中有以一善一行名世者不可易得若
賢人君子者千萬人一人耳進此而明道講學之賢則
間數世而一有我朝二百年来由此其選者落落如晨

星只有此數公而既不免身禍於當時又未免論議於
後世此雖非加損於諸賢而人情事理有不當然者昔
揚龜山晚年曰蔡京之薦而起在朝無甚建白人多疑
之胡康侯獨以為使彼時用其言猶可救得一半宋子
重稱之以為公論又謂龜山勿政居中之言出於某人
而不之信古之君子真尚先輩不敢輕加論議也如此
往時聞李叔獻嘗議晦齋有不滿之意私自歎息以為
今人從平地上點檢昔人得失甚易至於事到手裡何
嘗能及古人一二腳跟程子嘗見門人好議前人過失
必曰汝輩且學他長處又曰人當於有過中求無過不
當於無過中求有過春秋聖人之書其於曲直邪正之

轉至嚴至密一毫不放過猶曰為尊者諱為親者諱為
賢者諱臣子而諱君親固也至於賢者而猶諱之何也
蓋賢者其所全者大假使一一細德微有小出入不可
以小而傷大也況如臨齋先生身心内外表裡洞然潔
白光輝行止語默非道不行知此而猶不免於沈若而
索瘢則天下豈復有賢人君子可尊可尚者乎此風若
成後生末學相率效慕習以為虛談詆訾先賢無復顧忌
世道寧非可憂耶昔高皇帝不取孟子寇讐士芥之
論欲去配享今敢諫者射之禮部尚書錢唐抗疏入諫
袒脅受箭曰臣為孟軻死亦榮高皇帝見其誠懇取
疏以入孟子遂不廢配享高皇帝非不知孟子要亦

聖人一時抑揚之微權不可為萬世之正論故其事終於不行今者卡俗刑敝士多惜身便私直氣漸衰寧知聖上欲回車立教激昂振作以警昏昏者乎亦高皇帝之意也嗚呼明主可以理棄第未知今日之為錢唐者誰乎是可慨也

書陸宣公奏議後

使天而未欲平治天下也必不生如此才使天而欲平治天下也必使見用於世既生而又不得用此理之不可知者也嗚呼宣公之學上接伊傅管蕭以下不論也今其遺編尚在炳炳然致理之繩準興化之著蔡也有意於斯世者特舉而措之耳千古一慨

書徐克夫遊開東錄

僕養病比甚默默坐一室中不敢窺牖其於千里外佳
山好水競秀爭流之勝非徒足迹難及思想亦不到今
夏友人徐克夫為開東伯寄書相問發函得遊山錄一
篇余喜甚讀之累日而卒業凡開東湖海數百里烟霞
景致盡入於克夫吟咏之中嗚呼使余忘匏繫之陋而
發卧遊之興非此錄而誰也克夫之所以起余者多矣
抑因此而有所感焉嘉靖乙卯間吾先祖考宰扞城郡
余年十四承先人命自京往省出崇仁門而東時方初
夏風日妍和芳草滿野倉庚上下角角聞雄雉聲既而
入嶺西由洪川過麟蹄踰珍富嶺抵扞城所經沿途溪

山幽絕皆可玩也晨昏之暇與學子四五輩讀書城西
十里外鄉校校廨咸斯文軒所建前栽萬松鬱然清川
環其外余下帷惠倦往往猶同舍生以出濯足清流行
雲木之下其地多海棠花經夏不凋香氣冉冉襲人余
樂之出輒忘歸不知日之將暮也聞楓岳在旁郡宿齋
可至祖考以余年幼不許往獨仙遊潭清澗亭在治內
故間一造焉余於是始見東海明年春余還京每欲曰
事一絃以盡其時而亡亦也豈靈真異境有主者邪宿
緣未易致邪六自乙卯至甲辰中間星霜已換五十餘
度嘗謂事之遷者歟如夢而孤靈餘生獨留人世得聞故
人身歷其地處於斯唱撫事興懷寧不泫然余與克夫

雖內亦殊派其初同出於同福徐府君義我同一家不但
為平生交遊之好而已克天使余題錄後余不得辭遂
粗叙其當日東行始末以寓所感者而歸之

題東隱名臣言行錄

我國文學之上有新羅以上邈矣無可徵四維末崔文昌
注學於中國東還始約六經之祖其後相繼迭興者亦
不為少大抵皆以詞章名世耳其於益齋牧隱遊中國
得聞程朱性理之說自是東方始知詞章之外有儒者
之學於是圖隱首先興起為絕學之倡同時如陽村陶
隱雖未免於詞華而亦以道德性命訓誨後進故吉注
書學於陽村金司藝學於注書司藝之子曰佔显齋寒

賁金公一蠹鄭公皆出於仙里喬趙靜菴又寒暄之徒
其間雖有青於藍而寒於水考其淵源所自則皆有所
授受而不可誣也然則今此名臣中當擷出其一脈以
類編之其他卻觀言其鄭先弼諸公當以相業列於名
臣之流三足以下又以隱逸附焉則庶乎各從其類而
不紊矣侯尚論君子亦正焉

書商賁集後甲辰

孟子曰誦其詩讀其書不知其人可乎吾於此書亦云
焉磨日辰跋

書商賁集後

右癸未甲申日錄者亡友兩性傳景善所著也余於景

善同年生遊進陶先生之門為同志友田子歆余下龍
宮護外舅喪經歲景造相遇於水面村逆旅之中明年
景善就漢城樂善坊第與余同處讀書者幾十年自是
情好甚焉其後余登丙寅科景善登丁卯科又同朝其
在臺閣言論處事雖不謀識而略相符合至若世路多
梗升沉不齊而平日相知之意猶一日未始少異也景
善服高於世間人少許可意而不取雖對面不與語往
往閉門拒人以此多怨於時坎輒窮困而卒不變以死
身後猶有削職之禍哀哉其所藏書籍兵亂中散失殆
盡而獨有此日記一卷又集余往來書尺留其家景善
內子許氏悉取以送于余余撫卷三歎至於流涕蓋思

知心之不可以復得而哀吾黨之益衰也萬曆庚子五月十一日西厓書于河上

又書其後

洪範曰凡厥庶民無有淫朋人無有比德惟皇作祿極之不逮而人各以好惡相從則亂由是生今看景善日記為之流涕傷其禍殃自此始也

題古今書法精選帖

亂後圖刻蕩無存者一日有吏全守於何得此帖遺之晉宋間名人筆蹟尚有可考焉仍識其來處云

書水經集解

嗚呼歲月迷昧日邈今不記昔後不記今惟託之

於文字以示子孫曰得其終而不至忽亡者稍可盡
心焉耳近世俗儒金先生為其先人作墓誌錄余雖
不肖竊有慕焉歸而終莫之暇追記一二句先世以下
凡聞見所及者皆記之名之曰終大永慕錄此錄之傳
不傳未可知亦係於子孫之賢與否如果為一家世守
之物時出而展玩之不為塗壁覆瓦之歸則幸矣而不
敢必嗚呼悲夫

書臨瀛送別帖後

與昌遠別久忽忽歲已暮矣今得此帖撫玩如昨春江
別懷復形目前不覺開海之遠此古人所以不能已於
言也是歲閏九念七西生內翁題

題倦翁易圖後

右易圖五十二出近世孤山隱者皆本諸義文周孔之
舊邵朱諸老先生之說類次而疏瀹之以便觀覽非鑒
空杜撰者比也又有圖而無文尤足令學者虛心玩索
而自得之既得則凡象數之源性命之奧天地陰陽變
化不測之機粲然若指諸掌即倦翁所謂玩心其中足
以自老者誠有味乎其言之也翁姓抑氏名齊字美叔
世為豐山人翁隱居宣城之西村平生治經學杜門潛
思尤深於易然與人處頽如也未嘗自言雖隣里相識
莫有知其為學知道者翁既歿而其書始出今觀此圖
淵微質慤自不知不好者言之殆亦越人之章甫爾李

監司時發見而愛之登梓印布欲與世之事常編者共
焉使倦翁可作其必曰後世之子雲在可尚也已

書利川徐氏族譜後

利徐大姓也不可無譜然作譜亦非易事惟載簡而事
明為得法此譜首所記未知出於何人恨辭理不堪讀
耳下段所錄徐掌令事又誤掌令恭讓時臺諫士申四
月與金震陽諸公俱罪斥退居衿川不復仕本朝其詩
所謂神都隔漢陽者自衿川而言耳今日書憲府壁上
是誣其祖也得無千載惑耶果然太宗聖諭何以曰
伯夷也次句英雄字亦誤余當觀國朝寶鑑作忠良字
徐家如有賢子孫必正之然後可傳故云

箋

謝恩箋
乙巳正月

輸忠翼謨光國忠勤貞亮効節協策扈聖功臣大臣
輔國崇祿大夫豐原府院君臣柳成龍昧死上言恭遇
三功臣會盟祭禮成臣前緣衰病已極不能自力奔趨
瞻望盛舉日夜兢惶近有人來自都下賫奉到賜下
教書一軸并白金七兩既馬一匹表裏二端續於今年
正月初一日本道監司遵奉有旨事意使長吏存問
并致米豆酒饌臣不勝感激俱已吐向稽顙謝恩祇
受訖謹奉箋陳謝者臣誠惶誠恐頓首頓首伏以罪戾
餘生久負天地之鴻造孤朽微物更蒙雨露之涵濡感

涕自流驚魂如夢伏念臣庸才淺識受任踰涯出入帷
幄三十年報效無聞於獻替追隨羈縻數千里過咎益
彰於顛危素乏犬馬之勞再叨彛常之錄溫綸獎諭之
既過大賚便蕃而有加續當歲時之遷移又蒙存問其生
死長吏臨致官貺鼎來有命自天固難容於所免措躬
無地實愈懼而增慙茲蓋伏遇賞疑從優仁不遺舊陽
春之澤潤及陰崖日月之光普被窮鄙遂令鶩質荐荷
鴻私臣敢不白首丹心銜 恩戀闕周南滯迹莫趨鵷
鷺之班漢北懸誠長獻岡陵之祝臣無任瞻天仰 聖
慙懼屏營之至謹昧死陳謝以聞

銘


獨寢不愧衾銘

暮夜之暗帝其我位屋漏之幽神其爾伺勿謂無知其
機孔彰勿謂何傷其隱將及莫見者隱者微斯頑
不謹衆惡皆歸我有我心既明且靈一有爽德中心不
寧豈待人知然後為愧是以君子罔敢或肆一誠植中
動必以禮情慢邪僻寧設于體日用造次向晦無怠翼
翼兢兢維帝之則則邪去私是保是守內省不疚何愧
之有推其極致浩然天地卓哉西山用力深至一言警
策以迎來商作德日休作偽日拙聖狂之別由此異轍
不誠無物古聞其語臣拜銘之敢告衆御

日傘銘

西廬先生文集卷之十八
圖其形玄其色散為六合為一遇陽而開遇陰而闔惟
其動以天是以能覆物

西廬先生文集卷之十八





西庄九